

# JOSUÉ

## (Yuchué)

Yuchuéxũ naxuneta ga Tupana nax  
nũxĩ Iraéutanũxũgũmaxã  
inacuáxũcax

**1** <sup>1</sup>Rũ guma Tupanaarũ duũ ga Moiché yuxguwena, rü nüma ga Cori ya Tupana rü Moichéarü ngũxẽeruxũ ga Yuchué ga Núu nanemaxã nidexa, rü nhanagürü nüxũ: <sup>2</sup>—Rũ nhuxmax nax marü nayuxũ ya yimá chorü duũ ya Moiché, rü cuma tá nixĩ i guxũma i ngẽma Iraéutanũxũgũmaxã quixüexũ nawa i ngẽma natü i Yurdáu, nax nagu pichocuxũcax i ngẽma naane i pexna chaxãxũ. <sup>3</sup>Rũ yema marü Moichémaxã nüxũ chixuxürüxũ, rü chama rü tá pexna chanaxã i guxũma i ngẽma naane i marü nawa pengaguxũ. <sup>4</sup>Rũ ngẽma naane i tá pexna chaxãxũ, rü ngẽma chianexũ i súwaama ngẽxmaxũwa inaxügü rü nhuxmata Líbanuarü ma xpúnewa nangu i nórchiwaama. Rũ ngẽma naane rü taxtü i Eufrátewa inaxügü i léstewaama rü Etéutanũxũgũchixũanemaxã tá nangau nhuxmata Már i Mediterániuwa nangu i oéstewaama. <sup>5</sup>Rũ guxũma i ngunexũgü i

nagu cumaxũxũgu rü taxuxũtãma cuxũ narüporamae. Rũ chama rü tá cuxũtawã changexma, yema Moichéxũtawã chayexmaxürüxũ. Rũ tagutãma ngextã cuxũ chatax, rü tagutãma cuxũ chaxo. <sup>6</sup>¡Rũ cugü írüpõra rü tauxũ i cugü cutãeguxũ! Erü cuma tá nixĩ i nüxna cuyaxãchigüxũ i norü naane i nhaa duũxũgü, yerü yema nixĩ ga perü oxigũmaxã nüxũ chixuxũ. <sup>7</sup>Rũ wüxixicatama nixĩ i cumaxã nüxũ chixuxũ, rü ngẽma nixĩ nax tama cumuũxũ rü wüxiguxicatama curüxĩnũxũ rü aixcuma cunaxũxũ i ngẽma cumaxã nüxũ chixuxũ. Rũ chanaxwãxã i cuyanguxẽxã i guxũma i ngẽma mugü ga chorü duũ ga Moiché cuxna ãxũ. ¡Rũ êcü mea yanguxẽxã nax mea cuxũ ñanguxuchixũcax i guxũ i taxacü icuxũxũwa! <sup>8</sup>¡Rũ guxũgutãma duũxũgũna namaxã nacuxãxãchi i ngẽma nüxũ chixuxũ i chorü mugüpanewa! Rũ name nixĩ i cuma rü chütacü rü ngunecü rü nagu curüxĩnü i ngẽma chorü ore nax ngẽmaãcü mea cunaxũxũcax i ngẽma cumaxã nüxũ chixuxũ, rü mea cuxũ ñanguxuchixũcax i guxũma i taxacü i cuxũxũ. <sup>9</sup>Rũ chama

nixĩ i cuxũ chamuxũ nax cugũ cuporaxẽxũcax rü wüxigutama curüxĩnũxũcax. Rũ tama name icumuũxũ rü icuyarũmaãchi, erũ chama ya curũ Cori ya Tupana rü tá chacuxũtagu i ngextá cuma ícuxũxũwa —nhanagürü ga Tupana. Rũ nüma ga Yuchué rü nügü namexẽxẽ nax nayauxãxũcax ga yema naane. <sup>10</sup>Rũ yexguma ga nüma ga Yuchué rü nanamu ga yema Iraéutanũxũgüaru ãẽxgacügü, rü nhanagürü nüxũ: <sup>11</sup>—¡Guxũma i nhaa duũxũgütanügu pexĩãgütanü, rü namaxã nüxũ pexu rü nanutaqexegüã i õna! Erũ tá tamaepũx i ngunexũwa nanguxgu rü tá tichoũ i natü i Yurdáüwa nax tórxũxũ yixĩxũcax i ngẽma naane i tóru Cori ya Tupana tá tũxna ãxũ —nhanagürü ga Yuchué. ....

**Yuchué rü Yericówa nanamugü ga ngugütaeruügu**

**2** <sup>1</sup>Rũ yexguma nachica ga Chitüüwa nayexmagügu, rü yéma bexma inanamuãchitanü ga taxre ga ngugütaeruxũ, rü nhanagürü nüxũ: —¡Ëcü peyangugügu i ngẽma naane i natü i Yurdáüaru tocutüwa ngẽxmaxũ rü nhuxmata yima ñane ya Yericówa pengugü! —nhanagürü. Rũ nüma ga yema taxre rü yéma naxĩ rü wüxi ga ngexũ ga ngeãxẽxũ ga Raábigu ãégaxũpatawa nangugü ga Yericówa. Rũ ngĩma rü ngĩpatagu inapegüxẽxẽ ga yema chütaxũ. <sup>2</sup>Notürü nayexmaama ga wüxi ga duũxũ ga Yericóaru ãẽxgacümaxã nüxũ ixuxũ, rü nhanagürü nüxũ: —Nhuxre i Iraéutanũxũgü nua nangugü i ngewaxaru chütaxũgu nax

yangugüguãxũcax i nhaa naane —nhanagürü. <sup>3</sup>Rũ yemacax ga guma ãẽxgacü rü yema nge ga Raábixũtawa namuga rü nhanagürü: —¡Ínamuxũ i ngẽma yatügü i cuxũtawa ngugũxũ erũ ngẽma rü ngugütaewa nua naxĩ! —nhanagürü. <sup>4</sup>Notürü ga ngĩma rü inangãxũ rü ngĩgürügü: —Aixcuma nixĩ i taxre i yatü i chauxũtawa nangugũxũ, notürü tama nüxũ chacuax i ngextácüãx yixĩgũxũ. <sup>5</sup>Rũ marü noxri nachütagu nawoegu, erũ ngẽma oragu nixĩ i nawãxtaxũ ya daa ñanearü poxeguxũaru ñãx, rü tama nüxũ chacuax i ngextá nax naxĩxũ. Notürü ngẽxgumachi nhuxmatama nawe pengëgügu rü chi nüxũ peyangaugü —ngĩgürügü. <sup>6</sup>Notürü ga ngĩma rü dauxnagu inaxĩgüxẽxẽ ga yema taxre, rü yexma pagũxũ ga lífuchitüxũgu iyacuxgü. <sup>7</sup>Rũ guma ñanearü ãẽxgacüaru churaragü rü yema taxre ga ngugütaeruücax nadaugü nagu ga yema nama ga natü ga Yurdáü ínuxtamaxũwa nadaxũ. Rũ yexguma yema churaragü íchoxũguwenatama, rü nanawãxtagü ga norü ñãx ga guma ñanearü poxeguxũ. <sup>8</sup>Rũ naxũpa ga nax napeexũ ga yema ngugütaeruügu, rü ngĩma ga Raábi rü nawe dauxũ ixĩ, rü ngĩgürügü nüxũ: <sup>9</sup>—Chama nüxũ chacuax ya Cori ya Tupana rü pexna nanaxã i nhaa naane, rü ngẽmacax i nüma rü toxna naxĩnũ nax pexũ tamüëxũchixũcax. Rũ nhuxmax rü guxũma i duũxũgü i nuxma pegũxũ rü poraãcü pexũ namuë. <sup>10</sup>Rũ nüxũ tacuax ga yexguma Eyítuanewa ípenguxũgu, rü Tupana nixĩ ga yapayexẽxũ ga Már i Dauchiũxũ nax yéma pichoũxũcax. Rũ ngẽxgumarũxũ

ta nüxũ tacuax nax nhuxãcü penadaixũ ga Cheú rü Óyi ga Amurétanüxũgüartü ãëxgacügü ga natü ga Yurdáuarü tocutüwa yexmagüxũ. <sup>11</sup>Rü yexguma yemaxũ tacuaxgügu rü poraãcü tamuïe, rü taxúema tügü tixãüãxũ nax pemaxã tügü tadaixũcax. Erü yimá Cori ya perü Tupana rü guxãétüwa nangexma i dauxügüxũ i naanewa rü nhama i naanewa. <sup>12</sup>Rü ngëmacax pexna chaca rü nhuxmatama chanaxwaxe i Tupanaégagu chamaxã nüxũ pexu rü mea tá namaxã pechopetü i chautanüxũgü, ngëxgumarüxũ i chama nax meama pexũ chayaxuxürüxũ. ¡Rü choxna penaxã i wüxi i cuaxruxũ nax ngëmawa nüxũ chacuáxũcax nax aixcumaxũ chamaxã pexuxũ! <sup>13</sup>Rü chanaxwaxe i guxũma i túmaarü ngëmaxũgümaxã tüxũ pengechaũ ya chorü papá, rü chorü mamá, rü chaueneegü, rü chaueyaxgü. ¡Rü tauxũ i toxũ pedaixũ! —ngígürügü. <sup>14</sup>Rü nümagü rü ngixũ nangãxũgagü rü nhanagürügü ngixũ: —Toma tátama pexũ ítapoxũ rü pexna tadau nax taxuxũma pexũ ípetüxũcax, ega cuma rü tama toxũ quixuxgu. Rü ngëxguma Cori ya Tupana toxna naxãxgu i nhaa naane rü aixcuma tá mea cuxna tadau —nhanagürügü. <sup>15</sup>Rü ngïma ga Raábi rü wüxi ga í ga ñanearü poxeguxüwa yaxúxünegu ipe. Rü yema poxeguxüarü ñãxwa wüxi ga napanãxãgu ínachüxüe ga yema taxre ga ngugütaeruügü. <sup>16</sup>Rü ngígürügü nüxũ: —¡Ëcü mãxpúneanewa pexĩ rü ngëxma peyarücuxgü nax tama pexũ inayauxgüxũcax i ngëma pexcax daugüxũ! ¡Rü tamaepüx i ngunexũ tá ngëxma picuxgü, rü nhuxmatáta

ñanecax nawoegu i ngëma pexcax daugüxũ! Rü ngëmawena rü marü name i ípixĩ —ngígürügü. <sup>17</sup>Rü nümagü rü ngixũ nangãxũgagü rü nhanagürügü: —Toma rü tá tayanguxëxë i ngëma Tupanaégagu toxna naxcax cucaxaxũ. <sup>18</sup>Notürü ngëxguma marü nhaa naanegu tachocuxgu, rü nhaa ñãx ga nawa toxũ curüchüxüexüwa tá cunatunütaxëxë i nhaa napanãxã i dáunütaxũ. Rü daa cupatagu tá tüxũ cungutaquexëxë ya cunatü rü cué rü cueneegü rü guxãma ya cunatütanüxũgü. <sup>19</sup>Notürü ngëxguma chi ngexerüüxe cuchiüwa íxüxüxgux rü túmagagutátama nixĩ ega tayuxgux, rü marü taxütáma togagu nixĩ. Notürü ngëxgumachi ngexerüüxe cuchiüwa ngëxmaxexũ yamãxgügu, rü ngëxguma rü tá togagu nixĩ. <sup>20</sup>Notürü ngëxguma chi toxũ quixuxgux, rü taxucaxma tayanguxëxë i ngëma Tupanaégagu cumaxã nüxũ tixuxũ —nhanagürügü. <sup>21</sup>Rü ngïma rü inangãxũga rü: —Marü name —ngígürügü. Rü yexguma ga ngïma rü nüxũ irümoxë, rü nümagü rü ngixna nawoegu. Rü yemawena rü yema ngírü ñãxwa iyanãx ga napanãxã ga dáunütaxũ. <sup>22</sup>Rü yema taxre ga ngugütaeruügü rü ínamãxpúneanexüwa naxĩ rü tamaepüx ga ngunexũ yexma narücuxgü. Rü yoxni ga churaragü rü guxüanegu naxcax nadaugü rü taxuguma nüxũ nayangaugü, rü düxwa Yericóarü ñanecax nawoegumare. <sup>23</sup>Rü yexguma ga nüma ga yema taxre ga ngugütaeruügü rü mãxpúneanewa narüchoũ rü natü ga Yurdáuarü tocutüwa naxĩ ga Yuchué íyexmaxüwa. Rü namaxã nüxũ nixugüe ga guxũma ga nüxũ ngupetügüxũ. <sup>24</sup>Rü nhanagürügü:

—Nüma ya Cori ya Tupana rü marü tûxna nanaxã i guxũma i ngẽma naane. Rû ngẽmacax i guxũma i ngẽma nachixũanecũax i duũxũgü rü poraãcü tûxũ namuũe —nhanagürügü.

**Iraéutanüxũgü rü natü ga  
Yurdáüwa nichoũ**

**3** <sup>1</sup>Rü moxũãcü paçmamaxũchi rü nüma ga Yuchué rü guxũma ga Iraéutanüxũgümaxã rü Chitfũwa inaxãchi nhuxmata natü ga Yurdáüwanacüwa nangugü. Rû naxũpa ga nax yachoũxũ rü yexmatama napegü. <sup>2-3</sup>Rü yexguma tamaepũx ga ngunexũ ngupetüguwena rü yema Iraéutanüxũgüarü ãëxgacügü rü norü duũxũgütanü nixĩägüetanü rü namaxã nüxũ nixu rü nhanagürügü: —Ngëxguma nüxũ pedaxgu i chacherdótegü i Lewítanüxũ nax nua nachopetüxũ namaxã i ngẽma baú i Cori ya Tupanaarü mugüchixũ jrü ípechoxũ i ngextá ípengexmagüxũwa rü nawe perüxĩ! <sup>4</sup>Rü ngẽmaãcü tá nüxũ pecuax nax ngextáama pexĩxũ yerü ga üpa rü taguma texé i petanüwa nagu tixü i ngẽma nama. ¡Notürü taxúetãma nüxna tangaicama i ngẽma baú! ¡Rü guxũgutãma wüxi i quirúmetru tá nixĩ i norü yáxũ i nawe nax pexĩxũtanüxũ! —nhanagürügü. <sup>5</sup>Rü yexguma ga Yuchué rü yema Iraéutanüxũgüxũ nhanagürü: —¡Tupanapexewa pegü pimexëëgü! Erü moxũ rü nüma ya Cori ya Tupana rü tá pexũ nüxũ nadauxëxë i wüxi i mexũ i taxũ i norü poramaxã naxüxũ —nhanagürü. <sup>6</sup>Rü yexguma ga nüma ga Yuchué rü yema chacherdótegüxũ nhanagürü: —¡Ëcü

wixpëxegu peyangetaxũ i ngẽma baú i Tupanaarü mugü nawa ngëxmaxũ rü topëxe namaxã pexĩ nawa i ngẽma natü i Yurdáü! —nhanagürü. Rû yexguma ga nüma ga chacherdótegü rü duũxũgüpëxegu nayangetaũgü ga yema baú. <sup>7</sup>Rü yexguma ga Cori ya Tupana rü nhanagürü Yuchuéxũ:

—Nhuxmacürüwa tá cuxũ chataxëxë rü yexeraãcü tá cuxna cuax chaxã i napëxewa i nhaa Iraéutanüxũgü. Rû ngẽmaãcü tá nüxũ nadaugü nax chama rü aixcuma chacuxũtaguxũ yexgumarüxũ ga Moichéxütawa chayexmagurüxũ. <sup>8</sup>Ëcü ngẽma chacherdótegüxũ namu nax yangetaũgüãxũcax i ngẽma baú i choriü mugü nawa ngëxmaxũ! Rû ngëxguma natü i Yurdáüwa nangugügu jrü nachixüwa nachoũ rü ngëxma yachigütanüãchi! —nhanagürü. <sup>9</sup>Rü yexguma ga Yuchué rü yema Iraéutanüxũgüxũ nhanagürü: —¡Nua pexĩ rü iperüxĩnüe i ngẽma ore i Cori ya tórü Tupana nüxũ ixuxũ! <sup>10</sup>Rü ngëmawa tá nixĩ i nüxũ pecuáxũ ya Tupana ya maxücü rü petanüwa nax nangexmaxũ. Rû nüma ya Cori rü tá ínanawoxũ i Canaãatanüxũgü, rü Etéutanüxũgü, rü Ewéutanüxũgü, rü Ferechéutanüxũgü, rü Yerguechéutanüxũgü, rü Amuréutanüxũgü rü Yebuchéutanüxũgü nawa i ngẽma naane nax pema nawa pingugüxũcax. <sup>11</sup>¡Rü nüxũ perüdaunü i ngẽma baú i Cori ya Tupana i guxũ i naanearü yora ixĩcüarü mugüchixũ nax nhuxãcü pepëxewa yaxüexũ i natü i Yurdáüwa! <sup>12</sup>Rü ngẽmacax, Pa Duũxũgüx jrü nüxũ pexuneta i 12 i yatügü! Rû ngẽma 12 i

petücumüwachigü, rü tá nüxũ pexuneta i wüxi. <sup>13</sup>Rü ngëxguma ngëma chacherdótegü i ngëma baú i Cori ya Tupanaarü mugüchixũ ingegüxũ rü natü i Yurdáuchiüwa nachixũgu, rü ngëxguma tá nixĩ i ngëma natü rü taxregu yayauxyeüchiüxũ, rü ngëma dexá i dauxquena ne yaxũ rü tá ínayachaxãchi, rü nhama yapoxyepëxexürüxũ tá nixĩ —nhanagürü. <sup>14-16</sup>Rü nüma ga yema Iraéutanüxũgü rü inaxiãchi ga yema ínapegüxüwa ga natü ga Yurdáüwa nax yachoüxüçax. Rü nanetüarü buxgüarü tauemacü nixĩ ga yexguma, rü yema natü ga Yurdáü rü poracü narübai. Rü nümagü ga chacherdótegü rü duüxũgüpegegu naxĩ namaxã ga yema baú ga Tupanaarü mugü nawa yexmaxũ. Rü yema chacherdótegü ga baú ingetaüxüxũ rü yexguma yema natü ga Yurdáuchiüwa nachoügu, rü yema dexá ga dauxquena ne yaxũ rü ngürüiãchi ínayachaxãchi. Rü guma dauxquenaxüchi yexmane ga íane ga Adáü ga dauxütaechica ga Charetáüarü ngaicamána, rü ngürü nabainagü ga dexá ga yéma, nhama yapoxyepëxexürüxũ. Notürü yema íyachoüxüarü tawaama ga dexá rü niyax nhüxmata már ya Ngearü Maxüáxüwa nangu. Rü yemaacü ga yema natü ga Yurdáü rü taxregu niyaxye, rü yema Iraéutanüxũgü rü nichoü ga íane ga Yericóarü toxmaxtawa. <sup>17</sup>Rü yemaacü ga guxüma ga yema duüxũgü rü paanexüwa nichoü nawa ga yema natü ga Yurdáü. Rü yexgumayane ga yema chacherdótegü ga yangegüxũ ga yema baú ga Cori ya

Tupanaarü mugüchixũ rü natüarü ngäxüchiteewa namaxã nayachaxãchitanü ga paanexüwa.

**Gumá 12 ga nutagü ga natü ga  
Yurdáüarü ngäxütamawa  
nadeäcüxchiga**

**4** <sup>1</sup>Rü yexguma guxüma ga duüxũgü ichoügu ga natü ga Yurdáüwa, rü nüma ga Cori ya Tupana rü Yuchuëxũ nhanagürü: <sup>2</sup>—Ngëma 12 i Iraéutanüxũgütücumüwa rü jëcü wüxütücumüwachigü rü nüxũ naxuneta ya wüxi ya yatü! <sup>3</sup>Rü namaxã nüxũ ixu rü wüxichigü i ngëma yatü rü wüxipúta ya nuta yayauxchigüä i ngëma natüarü ngäxütamawa i ngëma chacherdótegü íchigüxüwa, rü nhama i chütaxügu ípeyapegüxüwa nax nanaäxüçax rü ngëxma yanupútaäxüçax! —nhanagürü. <sup>4-5</sup>Rü yexguma ga nüma ga Yuchuë rü naxçax naca ga yema 12 ga yatü ga nüxũ naxunetaxü rü nhanagürü nüxũ: —jËcü, wüxichigü i pemax i 12 i pexü chaxunetaxe rü natü i Yurdáüarü ngäxütamawa pexĩ! jRü ngëma baú i Cori ya tóru Tupanaarü mugüchixüpepexewaama rü wüxichigü i pema rü penayaxu ya wüxi ya nuta nax naëpüx yixixüçax i ngëma 12 tücumügü i tatanüxũgü! jRü pegüätügu peyange! <sup>6-7</sup>Rü yimá nutagü rü wüxi i cuaxruxũ tá nixĩ i petanüwa. Rü ngëxguma penegü pexna çaxgu, rü nhagügu: “¿Taxacüchiga nixĩ ya daa nutagü?” nhagügu, rü pema rü tá penangäxüga rü nhapegürügü tá: “Rü daa nutagüwa nixĩ i nüxna icuaxãchiexü ga yema ngupetüxü ga yexguma natü ga Yurdáüwa yangeetaxügu ga yema baú

ga Cori ya Tupanaarü mugüchixü, rü yema natüchixü rü taxregu niyauxye napexewa ga yema baú”, nhapegürügü tá —nhanagürü ga Yuchué. <sup>8</sup>Rü nümagü ga yema 12 ga yatügü rü nanaxügü ga yema Yuchué namaxá nüxü ixuxü. Rü wüxichigü, rü wüxipúta niyauxchigü naégagu ga yema natücumü ga nawa naxüxü. Rü yemaacü nanayauxgü ga 12 ga nutagü ga Yurdáüchitamawa. Rü yema ínapegüxüwa nanana, rü yexma nayanu, yema Cori ya Tupana nüxü ixuxürüxü. <sup>9</sup>Rü yexgumarüxü ta ga nüma ga Yuchué rü nai ga 12 ga nuta nanayaxu rü natüchitamagu nayanu ga yema chacherdótegü ga baú ingetaügüxü íchigüxügu. Rü yimá nutagü rü nhuxmarüta ngéma nangexmagü. <sup>10</sup>Rü yema chacherdótegü ga baú ga Tupanaarü mugüchixü ingegüxü rü natü ga Yurdáüchitamagu narücho, rü yoxni ga nüma ga Iraéutanüxügü rü meama nayanguxêégü ga guxüma ga yema Yuchuéwa Tupana namaxá nüxü ixuxü. Rü guxüma mea naxügü yema Moiché Yuchuémaxá nüxü ixuxürüxü. Rü nhuxãêãcü nichoü ga duüxügü. <sup>11</sup>Rü yexguma guxüma ga duüxügü marü inguügu, rü nichoü ga yema chacherdótegü ga baú ga Tupanaarü mugüchixü ingegüxü. Rü duüxügüpegegu naxägü.

.....

<sup>18</sup>Rü yexguma marü yanguügu ga yema chacherdótegü ga Yurdáüwa nax yachoüxü rü paanexüwa nangugügu, rü yema dexá rü wenaxarü nanagoxüchixü rü noxrirüütama nanapá ga natü.

.....

**Tupana nüxü nixu nax nhuxácü  
yapugüãxüçax ga Yericó**

**6** <sup>1</sup>Rü taxucürüwama texé Yericóarü íanegu taxücu rüexna ítaxüxü, yerü ga norü poxeguxüarü íãxgü rü narüwãxtagü nax yemaacü taxuwama nachocuxüçax ga Iraéutanüxügü. <sup>2</sup>Notürü nüma ga Cori ya Tupana rü Yuchuéxü nhanagürü: —Chama rü marü cuxna chanaxá ya Yericó i guxüma i norü ãëxgacümaxá rü norü churaragümaxá. <sup>3</sup>Rü curü churaragü i Iraéutanüxügü rü 6 i ngunexü tá yima íanexü ínayachoegu. Rü wüxi i üeguãchi tá naxügü i wüxichigü i ngunexügu. <sup>4</sup>Rü ngéma baú i chorü mugü nawa ngëxmaxüpegegu tá naxí i 7 i chacherdótegü i carnéruchatacuxremaxá icornétaáxü. Rü ngëxguma norü 7 i ngunexüwa nanguxgu, rü 7 expüxcüna tá yima íanexü ínayachoegu i curü churaragü, rü ngëxgumayane i ngéma chacherdótegü rü tá norü cornétagügu nicuegü. <sup>5</sup>Rü ngëxguma nüxü pexíüegu nax poraãcü yacuegüãxü ya cornétagü rü tá tagaãcü aita pexüe. Rü ngëxguma i norü poxeguxü ya yima íane rü tá nangíãchi. Rü ngëxgumayane rü wüxichigü i pemax rü tá nagu pechocu ya yima íane —nhanagürü ga Tupana. <sup>6</sup>Rü yexguma ga nüma ga Yuchué rü chacherdótegüçax naca rü nhanagürü nüxü: —¡Peyange i ngéma baú i Cori ya Tupanaarü mugüchixü! Rü 7 i pemax rü ngéma baüpegegu tá pexí namaxá ya cornéta i carnéruchatacuxrenaxçax ixígüne —nhanagürü. <sup>7</sup>Rü yema duüxügüxü rü ta nhanagürü ga Yuchué:

—¡Ēcü nüxũ ípeyachoeгу ya daa ãane!  
 Rũ pemax i churaragũ rũ tá baú i Cori  
 ya Tupanaarũ mugũchixũpexegu tá pexĩ  
 —nhanagũrũ. <sup>8</sup>Rũ guxũma ga duũxũgũ  
 rũ yema Yuchué namaxã nüxũ ixuxũãcü  
 nanaxũgũ. Rũ yema 7 ga chacherdótegũ  
 rũ norũ cornétagu yacuegũãcüma yema  
 baú ga Cori ya Tupanaarũ  
 mugũchixũpexegu naxĩ. Rũ yema baú rũ  
 yema chacherdótegũwe namaxã  
 nixĩxũtanũ. <sup>9</sup>Rũ yema churaragũ rũ  
 chacherdótegũpexegu naxĩ, rũ yema  
 togũ ga churaragũ ga baúarũ daruxũ rũ  
 wixweama naxãgũ. Rũ nũma ga  
 chacherdótegũ rũ norũ cornétagu  
 nicuegũecha rũ taguma inarũchianegũ.  
<sup>10</sup>Notũrũ guxũma ga yema churaragũ,  
 rũ Yuchué nüxna naxãga ga bexmamare  
 inaxĩxũcãx nhũxmatãta nũma namuã  
 nax guxũma wũxigu poraãcü aita  
 naxũexũcãx.

**Iraéutanũxũgũ nanapugũ  
 ga ãane ga Yericó**

<sup>11</sup>Rũ yema nüxĩraxũ ga ngunexũgu rũ  
 nũma ga Yuchué rũ nanamu ga  
 chacherdótegũ rũ churaragũ nax  
 wũxicana guma ãanexũ nax  
 íyangeegutaũgũãxũ ga yema baú ga Cori  
 ya Tupanaarũ mugũchixũ. Rũ yemawena  
 ga yema duũxũgũ rũ nawoegu naxcãx ga  
 yema ãnapegũxũwa. Rũ yexma nüxũ  
 nanangupetũxẽxẽ ga chũtaxũ. <sup>12</sup>Rũ  
 moxũãcü ga nũma ga Yuchué rũ  
 pařmamaxũchi ãnarũda, rũ nũma ga  
 chacherdótegũ rũ nanayauxtaũgũ ga  
 yema baú ga Cori ya Tupanaarũ  
 mugũchixũ. <sup>13</sup>Rũ yema 7 ga  
 chacherdótegũ rũ baú ga Cori ya  
 Tupanaarũ mugũchixũpexegu naxĩ rũ

nagu yacuegũãcüma ga guma norũ  
 cornétagũ. Rũ yema churaragũ rũ  
 wixpexegu naxĩ, rũ yema togũ rũ  
 baúweama naxãgũ. Rũ ga cornétagũ rũ  
 taguma inarũchianegũ. <sup>14</sup>Rũ moxũãcü rũ  
 wena guma ãanexũ ãnayachoeгу, rũ  
 nhũxmachĩ yema ãnapegũxũcãx nawoegu.  
 Rũ 6 ga ngunexũ nixĩ ga yemaacũ  
 naxũgũãxũ. <sup>15</sup>Rũ yexguma norũ 7 ga  
 ngunexũwa nanguxgu, rũ ngunetũxũ  
 ãnarũdagũ. Rũ guma ãanexũ  
 ãnichoeguãchitanũcũxũ yema nüxĩra  
 naxũgũãxgurũxũ, notũrũ yema  
 ngunexũgu rũ 7 expũxcũna nüxũ  
 ãnichoeguãchitanũcũxũ. <sup>16</sup>Rũ yexguma ga  
 yema chacherdótegũ rũ 7 expũxcũna  
 norũ cornétagu yacuegũgu, rũ Yuchué rũ  
 yema duũxũgũxũ namu rũ nhanagũrũ:  
 —¡Aita pixũe! Rũ nũma ya Cori ya  
 Tupana rũ marũ pexna nanaxã ya daa  
 ãane. <sup>17</sup>Rũ daa ãane, rũ guxũma i taxacũ i  
 nawa ngẽxmaxũmaxã, rũ tá  
 peyanaxoxẽxẽ, erũ ngẽmaãcü nixĩ i Cori  
 ya Tupana i nüxũ yaxuxũ. Rũ ngẽma  
 Raãbiicatãtama iyixĩ i taxũtãma ngĩxũ  
 pimãxcũ namaxã i ngẽma duũxũgũ i  
 ngĩchiũwa ngẽxmagũxũ. Erũ ngĩma iyixĩ  
 ga iyacũxgũãxũ ga yema taxre ga yatũgũ  
 ga ngugũtaewa yema imugũxũ. <sup>18</sup>¡Rũ  
 nhũxmax i pemax rũ pegũna pedaugũ  
 nax tama penayaxuxũ i taxacũ i norũ  
 ngẽmaxũ ya yima ãanewa ngẽxmaxũ!  
 Erũ nũma ya Cori ya Tupana rũ namaxã  
 nanaxuegu ya daa ãane nax  
 peyanaxoxẽẽxũcãx rũ penadaiãcũxũcãx.  
 Rũ ngẽxguma taxũtãma ngẽmaãcü  
 penaxũxgux, rũ nũma ya Tupana rũ tá  
 chixexũ tamaxã naxuegu rũ tá chixexũ  
 taxcãx ãnanguxẽxẽ. <sup>19</sup>Notũrũ ngẽma úiru  
 rũ diẽrumũ rũ guxũma i ngẽmaxũgũ i

bróchenaxçax rü fêrunaxçax, rü Cori ya Tupanaçax tá nixí rü norü ngêmaxũgütanügu tá penanu —nhanagürü ga Yuchué. <sup>20</sup>Rü yexguma ga nüma ga yema duũxũgü rü aita naxüe rü ga cornétagü rü naxāgatanü. Rü yexguma guma cornétagagüxũ naxĩnüegu ga nüma ga Iraéutanüxũgü rü inanaxügie nax poraäcü aita naxüexũ. Rü yexguma ga guma ñanearü poxegüxũ rü napuxāchi. Rü yexguma ga nüma ga Iraéutanüxũgü rü yoxni tauxchaäcü yexma nachocu, rü noxrüxũ nayaxĩgüxêxê. <sup>21</sup>Rü yemawena rü taramaxā tüxũ nadai ga yatixe, rü ngexe, rü ngextüxügüxe, rü yaxguāxgü, rü wocagü, rü carnérugü, rü búrugü. Rü noxtacüma guxũma nadai. <sup>22</sup>Rü nüma ga Yuchué rü yema taxre ga yatügü ga ngugütaewa ñxũxũ nhanagürü: —¡Ëcü ngĩpatawa pexĩ i ngêma nge i Raábi rü guxũma i ngĩtanüxũmaxā nua ngĩxũ pega, yema ngĩmaxā ipexunetaxũrüxü! —nhanagürü. <sup>23</sup>Rü nümagü rü ngĩchiũgu nachocu. Rü Raábixũ ñagaxüchigü tümamaxā ya ngĩnatü, rü ngié, rü ngĩeneegü, rü guxũma ga ngĩtanüxũmaxā. Rü wüxi ga nachica ga mexũ ga Iraéutanüxũgü ípegüxũarü düxétüwaama yexmaxũgu ngĩxũ nayamugü.

.....

<sup>27</sup>Rü nüma ga Cori ya Tupana rü Yuchuéxũ narüngüxêxê, rü yemaçax guxũma ga yema naanewa nangu ga nachiga.

#### Acáuarü chixexũchiga

**7** <sup>1</sup>Rü wüxi ga Yudátanüxũ ga Acáũgu äégaxü ga Cáarmi nane ga Chádítaxa rü Cháratataxaxa ixĩxũ, rü nanade ga nhuxre ga yemaxũgü ga Tupana

chüxuxũ. Rü yemaçax ga guxũma ga Iraéutanüxũgü rü naxüétüũgü ga Cori ya Tupanapexewa yerü ga Acáũ rü nanayaxu ga yema Tupana chüxuxũ. Rü yemaçax ga Cori ya Tupana rü Iraéutanüxũgümaxā nanu.

#### Acáuarü chixexũgagu rü Iraéutanüxũgüxũ narüporamaegü ga ñane ga Áixarü duũxũgü

<sup>2</sup>Rü nüma ga Yuchué rü Yericówa inanamuächitanü ga nhuxre ga yatügü nax ñane ga Áixwa yangugütaegüxũçax, rü ngoxi nüxũ natauxcha nax guma ñane rü tá nagu nachocüxũçax. Rü guma ñane rü ñane ga Betéuarü léstewaama nayexma ga chianexũ ga Betawéuarü ngaicamána. Rü nümagü rü yéma naxĩ rü nayangugütaegü. <sup>3</sup>Rü yexguma nawoegugu, rü Yuchuéxũ nhanagürügü: —Tama tanaxwaxe i guxũ i churaragümaxā naxçax ítayachööchi ya yima ñane ya Áix, erü 2,000 rüexna 3,000 i churaragümaxā nixĩ i marü yangüxũ nax yapüxuxü ya yima ñane. ¡Rü taxütáma guxũ i churaragü ngéma cumugü! Erü tama namu i ngéma duũxũgü ya yima ñanena daugüxũ —nhanagürügü. <sup>4</sup>Rü yemaacü 3,000 ga churaragü nixĩ ga Áixçax íyachööchixũ. Notürü nüma ga yema duũxũgü rü Iraéutanüxũgüxũ narüporamaegü rü nayabuxmüxêxê. <sup>5</sup>Rü 36 ga Iraéutanüxũgüxũ nadai, rü guxema toxoguāx rü tümawe nangégü nhuxmata guma ñanechipenüwa nangugü, rü ñnatüächianexũgu tüxũ nayadai. Rü yemaçax ga Iraéutanüxũgü rü narümaxächitanü rü namuüe. <sup>6</sup>Rü nüma ga Yuchué rü yema Iraéutanüxũgüarü

ãëxgacügü rü norü ngechaũmaxã  
 nügüchirugu nagáugüe rü  
 waixümütëxemaxã nügü nigügüeru. Rü  
 nhuxmachi yema baú ga Tupanaarü  
 mugüchixüþëxegu nanangücuchitanü  
 nhuxmata nayáuane. <sup>7</sup>Rü nüma ga  
 Yuchué rü nhanagürü: —Pa Corix  
 ¿tüxcüü cuyachoũxëxë ga nhaa duũxügü  
 ga natü ga Yurdáúwa? ¿Ëxna  
 Amuréutanüxügümëxëgu toxü  
 cuyixëëxüçax nixí i nua toxü cugagüxü  
 nax ngëmaäcü toxü nadaixüçax? Rü  
 narümemaë chi nixí ga natü ga  
 Yurdáuarü tocutü chitama tarüchoxü.  
<sup>8</sup>Pa Corix. ¿Taxacü tá chaxüxü i  
 nhuxmax? Erü nüma i Iraéutanüxügü rü  
 marü norü uanüchaxwa nibuxmü. <sup>9</sup>Rü  
 nüma i Canaáatanüxügü rü guxüma i  
 duũxügü i nhaa naanegu pegüxü rü tá  
 nüxü nacuáchigagü i ngëma toxü  
 ngupetüxü. Rü nüma rü tá wüxigu  
 toxçax ínayachöõchi nax toxü  
 nadaixüçax, rü taxüetáma ítayaxü i  
 totanüwa. ¿Rü texé tá cuxü ticuaxüxü  
 rü cuxü tataxëxë i ngëxguma?  
 —nhanagürü ga Yuchué. <sup>10</sup>Rü nüma ga  
 Cori ya Tupana rü Yuchüxü nangãxüga  
 rü nhanagürü: —¡Inachi! ¿Taxacü  
 ngëma cuxü i nhaxtüanegu  
 cunangücuchixü? <sup>11</sup>Rü nüma i  
 Iraéutanüxügü rü chixexü naxügü. Erü  
 nümagü rü tama nayanguxëxë i ngëma  
 mugü ga namaxã nüxü chixuxü. Rü  
 nanayauxgüama i ngëma ngëmaxügü i  
 nüxna chachuxuxü. Rü meama nüxü  
 nacuaxgüäcüma naxçax nangixgü i  
 ngëma choxrü íxixü, rü norü  
 ngëmaxügütanügu nayacuxgü. <sup>12</sup>Rü  
 ngëmacax i pemax i Iraéutanüxügü rü  
 taxucürüwama nüxü perüporamaë i

perü uanügü. Rü naxchaxwa tá pibuxmü  
 rü pegagutama nixí i namexü i  
 noxtacüma peyuexü. Rü ngëxguma i  
 pema i nhuxmax rü tama paxa  
 ípenaguxgu i ngëma pexna chachuxuxü,  
 rü marü taxütáma petanüwa  
 changexma. <sup>13</sup>Rü nhuxmax rü inachi,  
 rü nangutaquexëxë i duũxügü! ¡Rü  
 namaxã nüxü ixu nax moxüçax nügü  
 yamexëëgüxü nax ngëmaäcü chapëxewa  
 ínangugüxüçax! Erü chama i Cori ya  
 perü Tupana rü nhacharügü: “Pemax,  
 Pa Iraéutanüxügüx, rü marü penayaxu i  
 ngëma ngëmaxügü i pexna chachuxuxü.  
 Rü ngëxguma taxütáma ípenaguxgu rü  
 tama pegüwa nüxü pexoxçgux i ngëma  
 chixexü, rü taxucürüwatáma perü  
 uanügüxü perüporamaë”, nhacharügü.  
<sup>14</sup>Rü moxü paxmama rü  
 petücumümaxächigü tá chapëxewa  
 pengugü i guxãma i pema i  
 Iraéutanüxügü. Rü chama i perü Tupana  
 nax chixixü rü tá nüxü chaxuneta i  
 ngëma natücumü i nawa naxüxü i  
 ngëma yatü i chixexü üxü. Rü nhuxüchi  
 ngëma natücumüwa rü tá  
 nügütanüxüäcü chapëxewa nangugü. Rü  
 chama rü tá nüxü chaxuneta i ngëma  
 nügütanüxütücumü i nawa nangexmaxü  
 i ngëma yatü. Rü ngëmawena rü tá  
 ngëma nügütanüxütücumüwa rü tá  
 nüxü chaxuneta ya yima ípata ya nawa  
 nangexmane i ngëma chixexü üxü. Rü  
 nhuxüchi yima ípatacüãxtanüwa rü tá  
 nüxü chaxuneta i ngëma yatü i chixexü  
 üxü. <sup>15</sup>Rü yixema tümaxütägu nüxü  
 iyangaugüxe i ngëma ngëmaxügü ga  
 chachuxuxü, rü tá tüxü nigugü namaxã i  
 tümaxacügü rü guxüma i tümaarü  
 ngëmaxügü, erü tümagagu chixexü

naxçax ínangu i Iraéutanüxügü, eri  
tama naga taxínü i chorü mu  
—nhanagürü ga Tupana.

### Acáüarü poxcuchiga

<sup>16</sup>Rü moxüãcü ga Yuchué rü  
paxmaxüchi ínarüda rü duüxügüxü  
namu nax natücumümaxächigü  
Tupanapexewa nangugüxü. Rü nüma ga  
Cori ya Tupana rü Yudátücumüxü  
naxuneta. <sup>17</sup>Rü yexguma ga Yuchué rü  
Yudátücumümaxã nüxü nixu nax  
nügütanüxütücumüãcü rü  
Tupanapexewa nax naxixü. Rü Tupana  
rü Cháratanüxüxü naxuneta. Rü yema  
Cháratanüxüwa rü guma Chádipataxü  
naxuneta. <sup>18</sup>Rü yema yatüxügü ga  
Chádipatacüãxgü rü Tupanapexewa  
nangugü, rü Tupana nüxü naxuneta ga  
Acáü ga Cármí nane ga Chádítaxa ga  
Yudátanüxü íxícü. <sup>19</sup>Rü yexguma ga  
Yuchué rü Acáüxü nhanagürü: —Pa  
Chaunex, rü name nixí i cunataxêxê rü  
nüxü quicuaxüxü ya Cori ya tórü  
Tupana. ¡Rü chamaxã nüxü i xü i taxacü  
nax cuxüxü! ¡Rü taxü ícuycaxü!  
—nhanagürü. <sup>20</sup>Rü Acáü nanangãxüga  
rü nhanagürü: —Aixcuma nüxü chixu,  
rü chixexü chaxü namaxã ya Cori ya  
tórü Tupana. Rü nhaa nixí i ngëma  
chaxüxü. <sup>21</sup>Rü Yericówa nüxü chadau  
ga wüxi ga mexechixü ga naxchiru ga  
Babiróníaanecüãxgüarü ü rü 200  
tachinü ga diëru, rü wüximenaxã ga  
úiru ga ngãxü ga quíruarü yexera yaxü.  
Rü choxü nangúcháü ga yema  
yemaxügü, rü yemacax chaugüxü  
chanade, rü chauchiümachiãgu  
chanatãxgü. Rü ngëma diërutachinügü  
rü aixpeguama chananu —nhanagürü.

<sup>22</sup>Rü yexgumatama ga Yuchué rü  
Acáüchiüwa nanamugü ga nhuxre ga  
yatügü, rü yexma nüxü nayangaugü ga  
yema yemaxügü ga yexma ícuxgüxü  
namaxã ga yema diëru ga natiüguama  
nuxü. <sup>23</sup>Rü nanade ga yema yemaxügü  
rü Yuchuépexewa nanana napexewa ga  
guxüma ga Iraéutanüxügü. Rü nümagü  
ga Iraéutanüxügü rü Tupanapexegu  
nayanu. <sup>24</sup>Rü yemawena rü Acüarü  
ngatexüwa Acáüxü nagagü namaxã ga  
yema diëru, rü yema naxchiru, rü yema  
úirumenaxã, rü nanegümaxã, rü  
naxacügümaxã, rü norü wocagümaxã,  
rü norü búrugümaxã, rü norü  
carnérugümaxã, rü napatamaxã, rü  
guxüma ga taxacü nüxü yexmaxümaxã.  
<sup>25</sup>Rü Yuchué rü Acáüxü nhanagürü:  
—¿Tüxcüü chixexü tatanüwa  
ícunguxêxê? Rü nhüxmax ya Cori ya  
Tupana rü ngëma chixexü tátama nixí i  
cuxna nanguxêxêxü —nhanagürü. Rü  
yema nhaxgu ga Yuchué, rü guxüma ga  
Iraéutanüxügü rü nutamaxã Acáüxü rü  
natanüxügüxü nadai. Rü nhüxüchi  
natanüwa nanangíxichi. <sup>26</sup>Rü  
yemawena rü nutagü naétüwa  
nanawogü. Rü gumá nutagü rü  
nhüxmax rü ta ngëxma naxãüxchita. Rü  
ngëmacax i nhüxmax i ngëma nachica  
rü Acüarü Ngatexügu naxáéga. Rü  
yemaacü Iraéutanüxügümaxã  
narüngüxmü ga Cori ya Tupana.

### Íane ga Áixü nanapugü ga Iraéutanüxügü

**8** <sup>1</sup>Rü nüma ga Cori ya Tupana rü  
Yuchuexü nhanagürü:  
—¡Taxucaxma cumüü rü icurümaxächí!  
¡Rü inaxüãchi naxçax ya yima íane ya

Áix, namaxã i guxũma i curü churaragü!  
 Erü chama rü tá pora cuxna chaxã nax  
 yima ãane ya Áixarü ãëxgacüxũ rü norü  
 duũxũgũxũ curüporamaexũçax. Rü yima  
 norü ãane rü norü naane rü cuxrü tá  
 nixĩ. <sup>2</sup>Rü guma Yericómaxã rü norü  
 ãëxgacümaxã cuxüxürüxũ tátama  
 cunaxü namaxã ya yima ãane ya Áix rü  
 norü ãëxgacü. Notürü i nhuxmagu rü  
 marü name i pegüxũ penade i norü  
 ngëmaxũgü rü naxünagü. Rü tá  
 ípenabaxgü, rü norü ãaneçaxwenaama  
 tá pexĩchi —nhanagürü. <sup>3-4</sup>Rü yexguma  
 ga Yuchué rü nügü namexëxë guxũma  
 ga norü churaragümaxã nax ãane ya  
 Áixçax íyachôöchixũçax. Rü  
 nayadexechi ga 30,000 ga churaragü, rü  
 chütacü yéma nanamugü. Rü  
 nayaxucyxëgü rü nhanagürü nüxũ:  
 —¡Mea iperüxĩnue! ¡Rü ipexĩachi rü  
 norü ãaneçaxwexguama peyarücxgü!  
 ¡Rü ípememare nax yima ãane gu  
 pechocuxũçax! <sup>5</sup>Rü ngëma togü i  
 duũxũgü rü chamaxã tá yima ãaneçax  
 ínayachôöchi. Rü ngëxguma yima  
 ãaneçax toxçax yayixgux nax toxũ  
 nadaixũçax, rü toma rü tá tibuxmü ga to  
 ga ngunexũgurüxũ. <sup>6</sup>Rü ngëxguma i  
 nümagü rü tá towe nangëgü erü tá nagu  
 narüxĩnue nax noxrirüxũ naxchaxwa  
 ibuxmüxũ i yixema i Iraéutanüxũgü.  
<sup>7</sup>Rü ngëxguma i pema rü tá peyayi i  
 ngëma ípicüxgüxüwa rü yima ãane gu tá  
 pichocu, erü Cori ya tóru Tupana rü  
 pexna tá nanaxã ya yima ãane. <sup>8</sup>Rü  
 ngëxguma marü nagu pichocüxgu, rü tá  
 nawa penangixichi, ngëma Cori ya  
 Tupana nüxũ ixuxürüxũ. Rü ngëmaãcü  
 nixĩ i pexũ chamuxũ —nhanagürü ga  
 Yuchué. <sup>9</sup>Rü yexguma ga Yuchué rü

inanamuãchitanü ga yema churaragü.  
 Rü nümagü rü inaxĩachi rü Betéu rü  
 Áixarü ngãxũmachatexegu nicüxgü ga  
 Áixçaxwenaama. Notürü nüma ga  
 Yuchué rü yema ínapegüxüwatama  
 nanangupetüxëxë ga chütaxũ. <sup>10</sup>Rü  
 moxũãcü noxri yangunechaũxgu rü  
 ínaruða ga Yuchué rü norü duũxũgũxũ  
 nidaugü. Rü nhuxüchi tümapexegu naxã  
 namaxã ga Iraéutanüxũgüarü ãëxgacügü  
 rü ãane ga Áixçax inaxĩachi. <sup>11</sup>Rü  
 guxũma ga norü churaragü rü guma  
 ãaneçaxwenaama ne naxĩ rü nüxũ  
 ningaicaetanü, rü wüxi ga  
 ngatexüpechinüwa nayachaxãchitanü ga  
 guma ãaneçaxwexgu. <sup>12</sup>Rü  
 nüma ga Yuchué rü ãane ga Betéu rü  
 Áixarü ngãxũmachatexegu nayacüxgü  
 ga to ga 5,000 ga yatügü ga guma  
 ãaneçaxwexgu. <sup>13</sup>Rü  
 yemaacü ga Iraéutanüxũgüarü  
 churaragü rü taxregu niyauxyetücumü.  
 Rü yema wüxütücumü rü ãaneçaxwexgu  
 toxoxwecüwagu nicüxgü, rü yema  
 totücumü rü yema  
 íyachaxãchitanüxüwa nayexmagü ga  
 ãaneçaxwexgu. Rü yema  
 chütaxũgu ga Yuchué rü nanaxüpepe  
 nüxĩra yema ngatexüarü ngãxüwa  
 nangu. <sup>14</sup>Rü yexguma Iraéutanüxũgüxũ  
 nadaxgux ga Áixarü ãëxgacü, rü norü  
 churaragümaxã nayayi nax nügü  
 nadaixũçax namaxã ga yema  
 Iraéutanüxũgü ga ngatexüarü tocutüwa  
 yexmagüxũ. Notürü tama nüxũ nacüçax  
 rü yema togü ga Iraéutanüxũgü nax  
 bexma norü ãaneçaxwexgu  
 nayacüxgüxũ. <sup>15</sup>Rü nüma ga Yuchué rü  
 norü churaragümaxã nibuxmüneta. Rü  
 yema nama ga chianexüwa nadaxũgu

nibuxmü naxchaxwa ga yema Áixarü churaragü. <sup>16</sup>Rü guxüma ga churaragü ga guma ñane ga Áixcüãxgü ixīgüxü rü Yuchuéwe nangëgü. Rü yexguma Yuchuéwe nangëgü rü yema norü ñanena niyáxüetanü. <sup>17</sup>Rü guxüma ga churaragü ga Áixcüãx rü Betéucüãx rü Iraéutanüxügüwe nangëgü, rü taxuxüma ñanewa nayaxü. Rü yema Iraéutanüxügüwe nax nangëgüxügagu rü guma ñane rü taxüema nüxna tadau rü nangeenümare ga norü ñãx. <sup>18</sup>Rü yexguma ga nüma ga Cori ya Tupana rü Yuchuéxü nhanagürü: —¡Ëcü, cuaxruxü nüxna naxã i ngëma curü churaragü i ñanecaxwexgu icüxgüxü nax nagu nachocuxücax ya yima ñane ya Áix, erü tá cuxna chanaxã ya yima ñane! —nhanagürü ga Tupana. Rü nüma ga Yuchué rü cuaxruxü inaxã nax nagu nachocuxücax ga guma ñane. <sup>19</sup>Rü yexguma ga yema icüxgüxü ga churaragü rü paxama ñanaxü rü guma ñanegu nachocu rü nawa nanangixichigü. <sup>20</sup>Rü yexguma nügü íyadaugü ga yema duüxügü ga Áixcüãxgü rü nüxü nadaugü ga nax ñatüxünagüétüxü ga guma norü ñane. Rü yemacax taxuwama naxüéga, yerü nüma ga Iraéutanüxügü ga noxri naxchaxwa chianexüwa buxmüchirëxü rü nügü nawoegu nax nadaiaxücax. <sup>21</sup>Rü yexguma Yuchué nüxü daxgux ga yema Iraéutanüxügü ga icüxgüxü rü marü guma ñanegu nax nachocuxü rü nawa nax nangixichigüãxü, rü nügü nawoegu rü Áixcüãxmaxã nügü nadai. <sup>22</sup>Rü nhüxmachi ga yema Iraéutanüxügüaru churaragü ga ñanegu chocuxü rü ñnachoxü. Rü yemaacü ga

yema taxretücumü ga Iraéutanüxügü rü nügüwa tüxü naxüxëxë rü tüxü ñnayauxü. Rü guxãma tüxü nadai. ....

**Yuchué rü maxpüne ga Ebáuwa  
duüxügücax nüxü nadaumatü ga  
Tupanaarü mugü**

<sup>30,31</sup>Rü yexguma ga Yuchué rü maxpüne ga Ebáugu rü Cori ya Iraéutanüxügüaru Tupanacax nanaxü ga wüxi ga ñmarearü guchicaxü, yema Moiché nüxü ixüxürüxü nawa ga yema mugüaru popera ga nhaxü: “¡Ëcü wüxi i ñmarearü guchicaxü naxü nawa ya nuta ya tama imexëpütägücü!” nhaxü. Rü yexguma ga yema Iraéutanüxügü rü yema guchicaxüwa nayagu ga naxünagü Tupanaarü ngüxmüxëërxü. <sup>32</sup>Rü yemawena ga nüma ga Yuchué rü Iraéutanüxügüpexewa gumá nutagü ga ñmare nawa ñnagucüpütagu nanaxümatü ga Tupanaarü mugü ga Moiché nüxna ãxü. <sup>33</sup>Rü yexguma ga guxüma ga Iraéutanüxügü norü ñëxgacügümaxã rü yema togü ga tama Iraéutanüxügü ixīgüxü ga natanüwa maxëxümaxã, rü taxregu niyauxye. Rü wüxitücumü rü maxpüne ga Ebáuwaama naxügü rü yema totücumü rü maxpüne ga Garachfüwaama naxügü. Rü yema taxretücumüaru ngãxümachatexegu nachigü ga yema chacherdótegü namaxã ga yema baü ga Tupanaarü mugüchixü. Rü yema chacherdótegü rü ñnamemaregü nax duüxügümaxã mexü naxuegügüxü. Rü guxüma ga yema naxüxü rü Moiché namaxã nüxü ixüxüãcüma nanaxü. <sup>34</sup>Rü yemawena ga Yuchué rü duüxügücax

tagaãcü nüxũ nadaumatü ga Tupanaarü mugü, rü nhuxãcü Tupana rü mexũ namaxã naxuegu i ngêma duũxũgü i naga ãnüexũ, rü chixexũ namaxã naxuegu i ngêma tama naga ãnüexũ. <sup>35</sup>Rü guxũma ga yema mugü ga Moiché nüxna ãxũ rü Yuchué nüxũ nadaumatü naxçax ga guxũma ga duũxũgü ga iyatũxũ, rü ingexũ, rü buxũgü, rü yema togü ga tama Iraéutanũxũgü ixĩgũxũ ga natanũwa maxẽxũ.

**Iraéutanũxũgũmaxã inaxũgagü ga  
Gabaóücüãxgü**

**9** <sup>1</sup>Rü gumá Etéutanũxũgũarü ãẽxgacü, rü Amuréutanũxũgũarü ãẽxgacü, rü Canaáatanũxũgũarü ãẽxgacü, rü Ferechéutanũxũgũarü ãẽxgacü, rü Ewéutanũxũgũarü ãẽxgacü, rü Yebuchéutanũxũgũarü ãẽxgacü, rü nüxũ nacuáchigagü ga yema Yericówa rü Áixwa ngupetũxũ. (Rü yema ãẽxgacũgü rü natü ga Yurdáuarü oéstege nixĩ ga naxãchiũgũxũ, rü nümaxũ rü ãnamáxpũxanexũgu rü togü rü ãnametachinũanexũgu, rü togü rü Már i Meditéraniucutügu rü nhuxmata Líbanuarü naanewa nangu.) <sup>2</sup>Rü yexguma ga guxũma ga yema ãẽxgacũgü rü nügũmaxã nagu narũxĩnũe nax nügü nangũxẽẽgũxũçax, rü Yuchémaxã rü Iraéutanũxũgũmaxã nügü nadaixũçax. <sup>3</sup>Notürü nüma ga Ewéutanũxũgü ga ãane ga Gabaóügu ãchiũgũxũ rü ta nüxũ nacuáchigagü ga yema Yuchué üxũ namaxã ga guma ãanegü ga Yericó rü Áix. <sup>4-5</sup>Rü nagu narũxĩnũe nax nhuxãcü womũxẽẽãcũma nügü ãnapoxũgũxũ. Rü yemaçax Yuchuéxũtawa naxĩ ga nhuxre ga norü

duũxũgü ga ingauxchiruxũ, rü ingauarü chapatuáxũ, rü norü tochicaxũ ga búrutawa rü ningau. Rü norü wũchixũ rü marü nhuxgumaxũgũxũ nixĩgü, rü norü poũ rü nichúe. Rü yemagu nügü nicũxgü nax nhama yáxũwa nax ne naxĩxũrũxũ yixĩgũxũçax. <sup>6</sup>Rü yexguma yema nachica ga Iraéutanũxũgü ãpegũxũ ga Yigágu ãégaxũwa nangugügu, rü Yuchuéxũ rü Iraéutanũxũgũxũ nhanagürügü: —Yáxũgũxũ i naanewa ne taxĩ rü tanaxwaxe nax tomaxã ãpexũgagũxũ nax tama yigü ãdaixũçax —nhanagürügü. <sup>7</sup>Rü nüma ga Iraéutanũxũgü rü Ewéutanũxũgũxũ nangãxũgü rü nhanagürügü: —Bexmana i pemax rü torü ngaicamagutama pipegü rü nhuxãcü tá i pemaxã mexũ i ãnüwa tangugũxũ —nhanagürügü. <sup>8</sup>Notürü ga nümagü rü Yuchuéxũ nangãxũgagü rü nhanagürügü: —Toma rü tá pexmexwa togü tangexmagũxẽxẽ nax pexũ tapuracũxũçax —nhanagürügü. Rü nüma ga Yuchué rü nüxna naca rü nhanagürü: —¿Texé pexĩgü i pemax? ¿Rü ngextá ne pexĩ? —nhanagürü. <sup>9-10</sup>Rü nümagü rü Yuchuéxũ nangãxũgagü rü nhanagürügü: —Rü yáxũwa ne taxĩ, erü nachigaxũ taxĩnũe ya Cori ya perü Tupana. Rü nüxũ tacuáchiga ga yema Eyítuanewa naxũxũ, rü nhuxãcü natü i Yurdáuarü tocutüwa pexũ nangũxẽẽxũ nax penadaixũçax ga yema taxre ga ãẽxgacü ga Amuréutanũxũgũarü ga Cheú ga Eboũwa ãẽxgacü ixĩcü, rü Óyi ga Bacháũwa ãẽxgacü ixĩcü. <sup>11</sup>Rü ngẽmacax i torü ãẽxgacũgü rü tomücügü rü nhanagürügü toxũ: “¿Pewemü tá ãpinge i perü namawaxũ rü

Iraéutanüxügütanüwa ípeyadaugü, rü nhapegüxü tá nüxü: 'Rü pexmexwa togü tangexmagüxëxë rü mexü i ñüwa pemaxã tangugüchaü', nhapegü ta!" nhanagürügü toxü. <sup>12</sup>Rü yexguma itaxiãchigu nax pexçax tayadauxüçax rü ga pou rü nanai, notürü i nhuxmax rü marü nichux rü nipamare. <sup>13</sup>Rü yexgumarüxü ta i nhaa naxçaxmüxü ga úwachiümaxã tanaxüãcu rü nimexechichirex ga noxri itaxiãchigu, notürü i nhuxmax rü marü narügáugü. Rü ngëxgumarüxü ta namaxã nangupetü i toxchiru rü torü chapatugü, erü yáxüwama ne taxí —nhanagürügü. <sup>14</sup>Rü nüma ga Iraéutanüxügü rü yema Gabaóücüãxgüwemüxü nangõxnetagü, notürü tama Cori ya Tupanana nacagüexíra ga taxacü tá namaxã naxüexü ga yema duüxügü. <sup>15</sup>Rü yexguma ga Yuchué rü yema Gabaóücüãxmaxã mexü ga ñüwa nangu, rü namaxã nüxü nixu nax taxütáma nadaiaxü. Rü yema togü ga Iraéutanüxügüarü ãëxgacügü rü Tupanaégagu Yuchuerüütama mexügu yema Gabaóücüãxmaxã narüxínüe. <sup>16</sup>Rü tamaepüx ga ngunexü ngupetüxguwena rü nüma ga Iraéutanüxügü rü nüxü nacuxgü nax norü ngaicamagutama naxãchiügüxü ga yema Gabaóücüãxgü. <sup>17</sup>Rü yexguma ga nhuxre ga Iraéutanüxügüarü churaragü rü inaxiãchi nax yema Gabaóücüãxgüarü ñanegüçax yadaugüxüçax. Rü tamaepüx ga ngunexügu norü ñanegüwa nangugü. Rü guma norü ñanegü rü Gabaóü nixí, rü Queafíra nixí, rü Berúchi nixí rü Quiriáchi-Yearíü nixí. <sup>18</sup>Notürü nüma ga Iraéutanüxügü rü tama yema

Gabaóücüãxgüxü nadai yerü yema norü ãëxgacügü rü Cori ya Iraéutanüxügüarü Tupanaégagu nüxü nixugüe nax taxütáma nax nadaiaxüçax. Rü yemaçax ga Iraéutanüxügü ga duüxügü rü tama norü ãëxgacügümaxã nataãxëgü, rü nachigagu nidexagü. <sup>19</sup>Notürü nümagü ga yema ãëxgacügü rü nhanagürügü: —Toma rü Cori ya tórü Tupanaégagu namaxã nüxü tixu nax taxütáma tanadaixü. Rü ngëmacax i nhuxmax rü taxucürüwa tanadai. <sup>20</sup>Rü nüé namáxë, erü ngëxguma chi taxüchima tayanguxëëgu i ngëma Tupanamaxã nüxü tixuxü rü nüma ya Tupana rü tomaxã chi nanu —nhanagürügü. <sup>21</sup>Rü yemaacü ga yema ãëxgacügü ga Iraéutanüxügü rü norü duüxügümaxã nüxü nixu nax tama nadaiaxüçax ga yema Gabaóücüãxgü. Notürü nüma ga Iraéutanüxügü rü norü dexáaru tooxüwa rü üxüaru tooxüwa nanapuracüexëxë. Rü yemaacü tama nanadai ga yema Gabaóücüãxgü. ....

**Amuréutanüxügüxü narüporamae  
ga Iraéutanüxügü**

**10** <sup>1,2</sup>Rü Adonichedé ga Yerucharéüaru ãëxgacü nüxü naxínü ga nhuxácü Yuchué rü Áixü narüporamae, rü nayamaç ga norü ãëxgacü rü nayanaxoxëxë ga norü ñane. Rü yexgumarüxü ta nüxü naxínü ga nhuxácü Yericóxü narüporamae rü nayamaç ga norü ãëxgacü. Rü nhuxüchi nüxü nacuáchiga nax Gabaóücüãxgü rü Iraéutanüxügümaxã mexü ga ñüwa nangugüxü nax tama namaxã nügü nadaiaxüçax. Rü yemaçax ga nüma ga

Yerucharéúarü ãëxgacü rü poraãcü namuũ yerü Gabaóü rü wüxi ga ãane ga taxũne rü porane ga Áíxarü yexera ixĩxũne nixĩ, rü norü duũxũgü rü nipora rü tama namuũewaxe. <sup>3</sup>Rü yemaçax ga nüma ga Adonichedé rü yéma namuga naxçax ga Yoábeũ ga ãane ga Ebróúarü ãëxgacü, rü Pireáũ ga ãane ga Yamúchiarü ãëxgacü, rü Yafía ga ãane ga Láquiarü ãëxgacü, rü Debí ga ãane ga Egrúúarü ãëxgacü. <sup>4</sup>Rü nhanagürü: —¡Nua pexĩ nax choxũ peyarüngũëëgũxũçax nax Gabaóücüãxgũmaxã yigü idaixũçax! Yerü Yuchuémãxã rü guxũma ga Iraéutanüxũgüarü ãëxgacügũmaxã mexũ ga ãnũwa nangugüe nax tama nügü nadaixũçax —nhanagürü. <sup>5</sup>Rü yemaçax ga yema 5 ga ãëxgacügü ga Amuréutanüxũgü ga Yerucharéúarü ãëxgacü, rü Ebróúarü ãëxgacü, rü Yamúchiarü ãëxgacü, rü Láquiarü ãëxgacü, rü Egrúúarü ãëxgacü, rü wüxigu naxítaquexe. Rü norü churaragũmaxã Gabaóúarü ãaneçax inaxĩãchi nax namãxã nügü nadaixũçax. <sup>6</sup>Rü yemaçax ga yema Gabaóücüãxgü rü Yigáwa ga Yuchuéxütawa namugagü, rü nhanagürügü: —¡Tauxũ ipexoexũ nax toxũ peyarüngũxẽëxũ i toma i perü puracütanüxũ nax tixĩgũxũ! ¡Rü paxa nua pexĩ nax toxũ peyarüngũxẽëxũ rü toxũ ípepoxũxũçax! Erü guxũma i ngẽma ãëxgacügü i Amuréutanüxũgü i maçxpũneanecüãxgü rü wüxigu toxçax naxítaquexe nax toxũ nadaixũçax —nhanagürügü. <sup>7</sup>Rü yexguma ga Yuchué rü Yigáwa inaxũãchi namãxã ga guxũma ga norü churaragü. <sup>8</sup>Rü nüma ga Cori ya Tupana rü nhanagürü nüxũ:

—¡Tauxũ i nüxũ cumuũxũ! Erü chama rü tá cuxmexgu chanayixẽë i ngẽma Amuréutanüxũgü. Rü bai tá i wüxi i cuxũ rüporamaexũ —nhanagürü. <sup>9</sup>Rü Yigáwa inaxũãchi ga Yuchué namãxã ga norü churaragü, rü chütacü inixũ. Rü yemaacü Amuréutanüxũgüxũ ãnayabaixgü rü nanadai. <sup>10</sup>Rü nüma ga Cori ya Tupana rü Iraéutanüxũgüpeçewa poraãcü yema Amuréutanüxũgüxũ namuũexẽë. Rü yemaçax ga Yuchuéarü churaragü rü ãane ga Gabaóügu nanadai ga muxũma. Rü nhuxũchi Béchi-Orúúarü namagu nawe ningẽxũtanü ga yema ibuxmũxũ. Rü nayadaietanü ga yema Amuréutanüxũgü nhuxmata ãanegü ga Achéca rü Machédawa nangugü. <sup>11</sup>Rü yexguma Iraéutanüxũgüchaxwa yabuxmügu ga yema Amuréutanüxũgü nawa ga yema tuãchixũ ga Béchi-Orúúwa daxũ, rü nüma ga Cori ya Tupana rü ixãpütaxũ ga gauxũ naétügu nayixẽë. Rü Iraéutanüxũgü daixũarü yexera yema gauxũmaxã nayue ga Amuréutanüxũgü. <sup>12</sup>Rü yexguma nüma ga Cori ya Tupana rü Iraéutanüxũgümexëgu nayixẽëgu ga yema Amuréutanüxũgü, rü nüma ga Yuchué rü duũxũgüpeçewa Cori ya Tupanamãxã nidexa rü nhanagürü: —Pa Tupanax, chanaxwaxe i ícuyachaxãchixẽëxũ ya uãxcü Gabaóúétüwa. ¡Rü ngëxgumarüxũ ta ya tauemacü rü íyachaxãchixẽë i Ayaróúarü ngatexũétüwa! —nhanagürü. <sup>13</sup>Rü gumá uãxcü rü gumá tauemacü rü yéma nayachaxãchigü nhuxmata ga Iraéutanüxũgü norü uanügũxũ nadai. Rü ngẽmacax i Yacháarü poperawa rü

nhanagürü: “Rü yimá üaxcü rü wixgutaax 24 ora ninge ga nax tama yanaxücuxü”, nhanagürü. <sup>14</sup>Rü yemaacü Tupana ínayachaxächixêxê ga üaxcü rü tauemacü nagagu ga wüxi ga yatüarü yumüxê. Rü úpaacü rü taguma yemaacü nangupetü, rü woo nawena ga yema rü taguma yemaacü nangupetü yerü woetama Iraéutanüügüétiwa naxü ga Tupana.

.....

<sup>40</sup>Rü Yuchué rü norü churaragümaxã nanadaiäcu ga guxüma ga yema nachixüanegü. Rü nüxü narüporamae ga yema äëxgacügü ga máxpüxanewa yexmagüxü, rü yema ínachianexüwa yexmagüxü, rü yema ínadóxonexüwa yexmagüxü, rü yema máxpúnearü tuächixüwa yexmagüxü. Rü yemaacü nanadai ga guxüma ga yema duüxügü. Rü bai ga wüxi ga íyaxüxü yema Tupana namaxã nüxü ixuxürüxü.

<sup>41-42</sup>Rü yemaacü wüxicana guxüma ga yema äëxgacügüxü nadai rü nanapu ga guxüma ga norü naanegü ga Cadé-Banéawa ínaxügü rü nhüxmata Gáchawa nangu, rü Gochéüwa ínaxügü rü nhüxmata Gabaóüwa nangu. Yerü woetama Iraéutanüügüétiwa naxü ga Tupana. <sup>43</sup>Rü yemawena ga Yuchué rü guxüma ga norü churaragümaxã rü ínapegüxüçax nawoegu ga Yigáwa.

.....

#### Carébiarü naane

**14** <sup>6</sup>Rü yema Iraéutanüügü ga Yudátücumüwa ügüxü rü Yigáwa naxí nax Yuchuémaxã yanadexagüxüçax. Rü nüma ga Carébi ga Chenécheutanüwa ücü ga Yefúne

nane, rü Yuchuéxü nhanagürü: —¡Nüxna nacuaçächi ga yema ore ga Cori ya Tupana norü duü ga Moichémaxã nüxü ixuxü ga tachiga ga chianexü ga Cadé-Banéawa! <sup>7</sup>Rü chama rü 40 ga taunecü choxü nayexma ga yexguma Moiché Cadé-Banéawa choxü imuächigu nax chayangügüçax ga nhama Canaãane. Rü yexguma chatáegugu rü meama namaxã nüxü chixu rü nhachagürü nüxü: “Rü ngëma naane rü name rü natauxcha nax nagu ichocuxü”, nhachagürü nüxü. <sup>8</sup>Notürü ga yema togü ga chamücügü rü nüxü nixu nax naxäücümaxü, rü yemaacü duüxügüxü namuüexêxê, rü yemaçax ínayaxoetanüächi ga nagu nax nachocuxü ga nhaa naane. Notürü ga chama rü tama nüxü icharüngüma ga Tupanaarü uneta rü nagu charüxínüecha. <sup>9</sup>Rü yexguma ga nüma ga Moiché rü meama chamaxã naxüga rü nhanagürü choxü: “Yema naane ga nawa cunguxü rü cuxrütátama nixí rü cutaagüarü tá nixí, erü aixcuma naga cuxínü ya tóru Cori ya Tupana”, nhanagürü. <sup>10</sup>Rü nhüxmax rü marü 45 ga taunecü nangupetü nax Cori ya Tupana rü Moichémaxã nüxü yaxuxü ga yema ore ga yexguma ínachianexüwa iyexmagügu. Rü yema chamaxã ínaxunetaxüçax rü nhüxmax rü ta chamaxü woo 85 ya taunecü choxü ngëxmaxü. <sup>11</sup>Rü nhüxmax rü ta chapora yexguma Moiché nhaa naanearü ngügüwa choxü muxürüütama, rü yexgumarüütama choxü natauxcha i nhüxmax nax ichaxüächixü nax daiwa chaxüxü. <sup>12</sup>Rü ngëmacax i nhüxmax rü cuxna naxçax chaca nax choxna

cunaxãxũcax i ngẽma naane i  
 maxpũneáxũ ga nũmatama ga Cori ya  
 Tupana chamaxã namaxã ixunetaxũ nax  
 choxna naxãaxũcax. Rũ cumax, Pa  
 Yuchuéx, rũ meama nũxũ cucuax nax  
 nhuxmax rũ ta nangexmagũxũ i ngẽma  
 nataagũ ga guma Enáqui ga taxũchicũ  
 rũ máchanexũchicũtanũxũ. Rũ ngẽma  
 norũ ãnegũ rũ nita rũ meama  
 ãnapoxegugũ. Notũrũ i chamax rũ nũxũ  
 chacuax nax Cori ya Tupana rũ tá choxũ  
 nangũxẽxũ nax ngẽma ãnawoxũãxũcax,  
 yema chamaxã nũxũ yaxuxũrũũtama  
 —nhanagũrũ ga Carébi. <sup>13</sup>Rũ yexguma  
 ga nũma ga Yuchué rũ Tupanaégagu  
 mexũ Carébimaxã naxuegu. Rũ nũxna  
 nanaxã ga Ebróũarũ naane nax noxru  
 yixĩxũcax rũ nataagũarũ yixĩxũcax. <sup>14</sup>Rũ  
 yemaacũ nixĩ ga Ebróũarũ naane ga  
 Carébiarũ yixĩxũ, rũ nhuxmax rũ ta rũ  
 nataagũarũ yixĩxũ. Yerũ nũma ga Carébi  
 rũ aixcuma Cori ya Iraéutanũxũgũarũ  
 Tupanaga naxĩnũ.

.....

#### Iraéutanũxũgũmaxã nidexa ga Yuchué

**23** <sup>1</sup>Rũ mucũma ga taunecũ  
 nangupetũ nax Tupana rũ  
 Iraéutanũxũgũxũ nangũxẽxũ nax norũ  
 uanũgũxũ naporamaegũxũcax. Rũ  
 yexguma ga Yuchué rũ marũ naya. <sup>2</sup>Rũ  
 nũma ga Yuchué rũ guxũma ga  
 Iraéutanũxũgũarũ ãẽxgacũgũcax  
 nangema. Rũ yema  
 wũxitũcumũchigũarũ ãẽxgacũgũcax  
 nangema, rũ yema ãẽxgacũgũ ga  
 guxchaxũgũarũ mexẽeruũcax nangema,  
 rũ yema churaragũerugũcax rũ ta  
 nangema. Rũ nhanagũrũ nũxũ: —Marũ

chipa erũ marũ chaya. <sup>3</sup>Pema rũ marũ  
 nũxũ pedau ga yema naxũxũ ga Cori ya  
 Tupana ga yexguma nadaiãgu ga yema  
 duũxũgũ ga perũ uanũgũ ixĩgũxũ. Yerũ  
 nũma ga Cori ya Tupana rũ peéũwa  
 naxũ. <sup>4</sup>Chama rũ wũxitũcumũchigũna  
 chanaxã ga yema naane ga nagu  
 pinguchigũxũ. Rũ tama yema naane ga  
 marũ penapuxũica nixĩ ga pexũ  
 chinũxũ, notũrũ namaxã chanangauxẽxẽ  
 i ngẽma naane i taxũta penapuxũ i natũ  
 i Yurdãũwa naxũgũ i léstewa, rũ  
 nhuxmata Már i Mediterãniwa nangu i  
 oéstewaama. <sup>5</sup>Rũ ngẽma duũxũgũ i  
 nhuxmax ngẽma naanegu ãchiũgũxũ, rũ  
 Cori ya Tupana rũ tá nawa ãnanawoxũ.  
 Rũ pema rũ tá pegũxũ penayaxu ngẽma  
 Cori ya Tupana nũxũ ixuxũrũxũ. <sup>6</sup>¡Rũ  
 mea peyanguxẽxẽ i ngẽma mugũ i  
 Moichéarũ poperagu ũmatixũ! ¡Rũ  
 ngẽma naxũmatixũãcũ nagu pemaxẽ!  
<sup>7</sup>¡Rũ taxũtãma namaxã pexãmaxgũ rũ  
 pexãtegũ i ngẽma togũ i duũxũgũ i  
 nhuxmax rũ ta petanũgu ãchiũgũxũ! ¡Rũ  
 taxũtãma norũ tupanaxũ pecuaxũxũgũ,  
 rũ bai tá i naga pexĩnũexũ, rũ bai tá i  
 norũ tupanaéga penaxuxuchixũ, rũ bai  
 tá i norũ tupanaégagu mexũ pexueguxũ!  
<sup>8</sup>¡Rũ nhuxmarũũtama rũ guxũgutãma  
 Cori ya tórũ Tupanawe perũxĩ! <sup>9</sup>Rũ  
 nũma ga Cori ya Tupana rũ marũ  
 pepexewa ãnanawoxũãcũ ga ãnegũ ga  
 itaxũne rũ iporane. Rũ nhuxmata  
 nhama i ngunexũwa nangu rũ taxũema  
 pexũ tarũporamae. <sup>10</sup>Rũ wũxĩetama i  
 pema rũ pexũ natauxcha nax 1,000 i  
 duũxũgũxũ nax pibuxmũxẽxũ, erũ Cori  
 ya perũ Tupana rũ peéũwa naxũ rũ  
 pexcax nũgũ namaxã nadai, yema  
 nũmatama pemaxã inaxunetaxũrũxũ.

<sup>11</sup>¡Rü pexuãxëgü rü pegüna pedaugü i perü maxüwa nax tama nüxü iperüngümaexüçax ya tóru Cori ya Tupana! <sup>12-13</sup>Rü chama rü chanaxwaxe i nüxü nax pecuáxü rü ngëxguma tá Tupanana pexigachigu rü nhaa duüxügü i petanüwa ngëxmagüxümaxã pexãmüçügu, rü namaxã pexãmaxgügu, rü pexãtegügu, rü nüma ya Cori ya perü Tupana rü taxütãma pexü narüngüxë nax ípenawoxüxüçax i ngëma duüxügü i petanüwa ngëxmagüxü. Rü nüma ya Tupana rü perü guxchaxüruxü tá nayaxigüxëxë i ngëma duüxügü nax ngëmaäcü naxmexgu peyixüçax. Rü ngëmaäcü nhama texé pexçaxwena nacuaixçaxürüxü tá nixí nhuxmatáta taxütãma petanüwa íyaxü nawa i nhaa mexü i naane ya tóru Cori ya Tupana pexna äxü. <sup>14</sup>Chama rü marü paxa tá chayü. Notürü naxüpa nax chayuxü rü chanaxwaxe i meama nüxna pecuaxächie rü Cori ya Tupana rü marü nayanguxëxë ga guxüma ga yema pemaxã nüxü yaxuxü. Rü bai ga wüxi ga yema norü uneta ga nüxü naxüpetüxü ga tama yanguxëëxü. <sup>15-16</sup>Notürü ngëxgumarüxü nax yanguxëëaxü i guxüma i ngëma mexü ga pemaxã inaxunetaxü, rü ngëxgumarüxü tá ta pexçax ínananguxëxë i naguxüraüxü i guxchaxü i ngëxguma tama aixcuma naga pexinüegu i ngëma uneta ga pemaxã nüxü yaxuxü. Rü ngëxguma to i tupanantagu perüxinüegu rü naxçax pemaxëgu, rü nüma ya Cori ya Tupana rü tá pemaxã nanu, rü paxaxüchi tá pexü inayarüxoxëxë nawa i nhaa naane

i mexü i nüma pexna naxãxü. Rü bai tá ya wüxie ípeyaxüächi —nhanagürü ga Yuchué.

**Yuchué rü duüxügüxü naxucuxë rü nüxü narümoxë**

**24** <sup>1-2</sup>Rü yexguma ga Yuchué rü Chiquéügu nanangutaquexëxë ga guxüma ga duüxügü ga Iraéutanüxügü, wüxigu namaxã ga yema wüxitücumüchigüari äëxgacügü ga yaxguãxgü, rü äëxgacügü ga guxchaxüari mexëëruxü, rü yema churaragüari äëxgacügü. Rü yéma Tupanapexewa nhanagürü: —Yimã tóru Tupana i yixema i Iraéutanüxügü rü nhanagürü: “Nüxcüma ga nüma ga Terã rü nanegü ga Abraãü rü Naó ga perü oxigü ixigüci, rü taxtü ga Eufrátcutügu naxächüügü. Rü yéma nixí ga togü ga tupanaxü yacuaxüügüxü. <sup>3</sup>Notürü ga chama ya Tupana rü yéma taxtü ga Eufrátcutüwa chanayaxu ga Abraãü, rü Canaãanegu chayaxügüchigüxëxë. Rü yéma nixí ga nane ga Isáqui nüxna chanamuxü nax yemaacü yamuxüçax ga nataagü. <sup>4</sup>Rü Isáquina chanamugü ga taxre ga nane ga Yacü rü Echaü. Rü Echaúna chanaxã ga naane ga máxpüxanëxü ga Cheígu äëgaxü. Notürü ga Yacü rü nanegü rü Eyítuanëwa naxí. <sup>5</sup>Rü yexguma ga chama ga Tupana rü Eyítuanëwa chanamu ga Moiché rü Aróü. Rü chanadai ga yema Eyítuanecüãxgü rü nhuxmata naxmëxwa pexü íchanguxüxëxë. <sup>6</sup>Rü yexguma perü oxigü Eyítuanëwa íchoxügu rü nüma ga Eyítuanecüãxgüari churaragü rü tûmawe nangëgu namaxã ga norü

cowarugü, rü naweũgü ga cowaru itügüne, rü nhuxmata Már i Dauchiũxüwa nangugü. <sup>7</sup>Rü nüma ga perü oxigü rü chauxcax nacagü, rü yemaçax ga naweama rü chanaxëanexëxë naxchaçwa ga Eyítuanecüãxgü. Rü yexgumarüxü ta chanaxü nax már naétügu inhaxüchiũxüçax ga yema Eyítuanecüãxgü nax yexma nayixüçax. Rü pematama nixí i nüxü pedauxü ga yema chaxüxü ga yexguma. Rü nhuxüchi ga pemax ga Iraétanüxügü rü yema ínachianexü ga taxúema íxãpataxüwa peyexmagü mucüma ga taunecü. <sup>8</sup>Rü yemawena nixí ga pexü chichocuxëexü nawa ga yema naane ga Amuréutanüxügü nawa yexmagüxü ga natü ga Yurdáuarü tocutüwa. Rü nüma ga Amuréutanüxügü rü pemaxã nügü nadai, notürü ga chama rü pexü charüngüxëë nax nüxü perüporamaegüxüçax rü pexmexëgu nayixüçax. Rü yemaacü penayaxu ga yema naane. <sup>9</sup>Rü nüma ga Baráqui ga Chipú nane ga guma Moábianarü ãëxgacü rü pemaxã nügü nadai. Rü nüma ga Baráqui rü Baraáu ga Beú nanecaç nangema nax chixexü pemaxã naxueguxüçax. <sup>10</sup>Notürü ga chama ya perü Tupana rü nüxna chanachüxu ga Baraáu nax chixexü pemaxã naxueguxüçax. Rü yemaacü peétüwa chachogü. <sup>11</sup>Rü yemawena ga pema rü pichoü nawa ga yema natü ga Yurdáü nhuxmata Yericóarü íanewa pengugü. Rü yema duũxügü ga guma íanegu áchiũgüxü rü pemaxã nügü nadai. Rü yexgumarüxü ta ga yema duũxügü ga Amuréutanüxügü, rü Ferechéutanüxügü,

rü Canaátanüxügü, rü Etétanüxügü, rü Yerguechéutanüxügü, rü Ewétanüxügü, rü Yebuchéutanüxügü rü pemaxã nügü nadai. Notürü ga chamaçax, rü pexü charüngüxëë nax nüxü perüporamaegüxüçax. <sup>12</sup>Rü tama pema nixí ga perü taragümaxã rü perü würagümaxã nüxü perüporamaexü ga yema taxre ga ãëxgacügü ga Amuréutanüxügüarü. Notürü chama nixí ga yema chanamugüxü ga máxegü nax namüexüçax rü yabuxmüxüçax naxüpa nax yema pengugüxü. <sup>13</sup>Rü chama rü marü pexna chanaxã ga naanegü ga tama pema pexüxü, rü íanegü ga tama pema pexügüne. Rü nhuxmax rü yimagu pexãchiũgü, rü penangõxgü i úwagü rü oríwagü ga tama pema ipetogüxü, nhanagürü ga Tupana. <sup>14</sup>Rü nüma ga Yuchué rü nhanagürü ta: —Guxüma i ngëma pemaxã nüxü chixuxüçax rü name nixí i mea Cori ya Tupanaga pexínüexü rü noxrütama ngúchaü pexüxü. Rü name nixí i nüxna pexíngachixü i ngëma nüxcüma ga perü oxigüarü tupanagü ga taxtü ga Eufrátécütüwa rü Eyítuanewa nüxü yacuaxüũgüxü. <sup>15</sup>Notürü ngëxguma tama Cori ya Tupanawe perüxixchaũgux rü nhuxmatama nüxü pexu i taxacürü tupanawe tá perüxixü, rüçxna ngëma tupanagü ga nüxcüma ga perü oxigü nüxü icuaxüũgüxü ga taxtü ga Eufrátécütüwa, rüçxna ngëma norü tupananetagü i Amuréutanüxügü i nhaa naanegu áchiũgüxü! Notürü i chamaçax, rü chauxacügü rü Cori ya Tupanawe tá nixí i tarüxixü —nhanagürü ga Yuchué. <sup>16</sup>Rü yexguma ga nüma ga duũxügü rü nhanagürügü: —Tagutáma nüxna

tixígachi ya tórü Cori ya Tupana, rü bai tá i nhuxgu togümare i tupanagüwe tarüxixü. <sup>17</sup>Yerü nüma nixí ya tórü Cori ya Tupana ga tüxü ínanguxüxëxü naxmexwa ga yema Eyítuanecüãxgü. Rü nüma nixí ga tapexewa naxüãxü ga yema muxüma ga mexügü ga noxrütama poramaxã naxüxü. Rü nüma nixí ga tüxna nadauxü rü tüxü ínapoxüxü nüxna ga tórü uanügü ga yexguma norü naanewa ichopetügu. <sup>18</sup>Rü nüma ga Cori ya Tupana nixí ga tapexewa ínawoxüãxü ga Amurétanüxügü rü yema togü ga duüxügütücümügü ga nhaa naanegu ächiügüxü. Rü ngëmacax tá nawe tarüxí, erü nüma nixí i tórü Tupana yixixü —nhanagürügü. <sup>19</sup>Notürü ga nüma ga Yuchué rü duüxügüxü nangãxü rü nhanagürü: —Pema rü taxütáma pexü natauxcha nax Cori ya Tupanaarü ngúchañ pexügüxü, erü nüma ya Tupana rü naxüüne rü poraäcü nüxü tachuxu. Rü taxütáma pemaxã yaxna naxínü ega tama naga pexínüegu rü chixexü pexügügu. <sup>20</sup>Rü ngëxguma tá nüxna pexígachigu rü togü i tupanagüwe perüxixgu, rü nüma ya Cori ya Tupana rü tá pemaxã nanu rü tá pexü napoxcue rü tá pexü nayarüioxëxë woo mucüma ga taunecügu mea pexna nax nadauxü —nhanagürü ga Yuchué. <sup>21</sup>Rü nüma ga duüxügü rü nanangãxü rü nhanagürügü: —Toma rü tagutáma nüxna tixígachi ya Cori ya Tupana, rü aixcuma norü ngúchañ tá taxügü —nhanagürügü. <sup>22</sup>Rü yexguma ga nüma ga Yuchué rü nhanagürü: —Nhuxma rü pematama nixí i nüxü pexuxü nax aixcuma tá norü ngúchañ pexügüxü ya

Cori ya Tupana —nhanagürü. Rü nüma ga duüxügü rü nanangãxü rü nhanagürügü: —Ngëmacüx, tomatama nixí i nüxü tixuxü rü nagu tarüxínüexü nax aixcuma Coriwe tarüxixü —nhanagürügü. <sup>23</sup>Rü yexguma ga nüma ga Yuchué rü nhanagürü: —¡Ëcü ípenawogü i ngëma togü i tupanenetachicünaxãgü i petanüwa ngëxmagüxü, rü aixcuma naxçax pewoegu ya yimá Cori ya tórü Tupana ya yixema i Iraétanüxügü! —nhanagürü. <sup>24</sup>Rü nüma ga duüxügü rü nanangãxü rü nhanagürügü: —Toma rü aixcuma tórü Cori ya Tupanaarü ngúchañ tá taxügü, rü ngëma tomamaxã nüxü yaxuxü rü tá tanaxü —nhanagürügü. <sup>25</sup>Rü yema ga ngunexügutama rü Chiquéuarü íanewa, rü nüma ga Yuchué rü duüxügümaxã wüxigu Tupanamaxã inaxügae nax guxügütáma naga naxínüexüçax. Rü nhuxüchi yema duüxügümaxã nüxü nixu ga Tupanaarü mugü rü norü ucuxëgü. <sup>26</sup>Rü guxüma ga yema mugü ga duüxügümaxã nüxü yaxugüxü, rü nanaxümatü nagu i Tupanaarü mugüpane. Rü yemawena ga Yuchué rü nanayaxu ga wüxi ga tacü ga nuta rü yema carabáyu ga Tupanapataciwawa rüxüxütüügu nayaxü. <sup>27</sup>Rü guxüma ga yema duüxügümaxã nüxü nixu rü nhanagürü: —Daa nutawa tá nixí i nüxna pecuaxächieüxü i guxüma i ngëma Cori ya Tupana pemaxã nüxü ixuxü. Rü ngëxgumarüxü ta rü daatama nuta nixí ya cuaxruxü ixücü i ngëxguma pema rü taxütáma peyanguxëxgu i ngëma Tupanamaxã nüxü pexuxü —nhanagürü ga Yuchué. <sup>28</sup>Rü yemawena ga nüma ga

Yuchué rü ínayamugü ga yema duñxügü  
nax wüxichigü norü naanecax  
nawoeguxñcax.

**Yuchuéarü yuxchiga**

<sup>29</sup>Rü yemawena rü noxre ga  
ngunexügü namaxü ga Yuchué ga  
Núu nane ga Tupanaarü duñ. Rü  
nayu ga yexguma 110 ga taunecü  
nüxü yexmagu. <sup>30</sup>Rü norü  
naanegutama nayataxgü ga  
Tima-Chéaraarü ñanewa. Rü yima ñane

rü Efraíarü naanearü  
máxpüxanexüwa nangexma rü  
Gaáxarü máxpúnearü nórciwa naxü.  
<sup>31</sup>Rü yexguma Yuchué maxñxgu rü  
núma ga yema Iraéutanüxügü rü mea  
Cori ya Tupanaga naxñüe. Rü woo  
ga Yuchuéwena rü mea naga naxñüe  
ga yexguma tauta nayueyane ga  
yema Iraéutanüxügüarü yaxguñxgü  
ga nüxü icuáxü ga guxüma ga yema  
Cori ya Tupana nüxcüma naxcax üxü.  
.....